

## I. DISPOSICIÓN XERAIS

### XEFATURA DO ESTADO

**15597** *Lei 14/2012, do 26 de decembro, pola que se aproban medidas urxentes para paliar os danos producidos polos incendios forestais e outras catástrofes naturais ocorridos en varias comunidades autónomas.*

JUAN CARLOS I

REI DE ESPAÑA

Saiban todos os que a viren e a entenderen que as Cortes Xerais aprobaron e eu sanciono a seguinte lei.

#### PREÁMBULO

Os incendios forestais teñen efectos devastadores nos ámbitos económico, ambiental e social, acentúan os procesos de desertificación e afectan a paisaxe, o ciclo da auga, a biodiversidade e o turismo. O risco de incendios forestais é inherente ás condicións climáticas do noso país. A súa prevención, por tanto, convértese nun dos labores máis importantes para a Administración. Os axentes económicos deben ser conscientes tamén deste risco e adoptar as medidas de prevención e de mitigación do seu impacto. Os cidadáns, pola súa parte, deben extremar as precaucións pois calquera imprudencia pode ter graves consecuencias.

Desde primeiros do mes de xuño producíronse grandes incendios en distintos puntos da xeografía española que calcinaron miles de hectáreas e mobilizaron numerosos medios terrestres e aéreos para a súa extinción e para a posta en marcha das tarefas de evacuación.

Trátase de incendios especialmente virulentos que comportaron a perda de varias vidas e cuxa extensión e propagación resultan destacables.

Por outra parte, desde finais do pasado maio producíronse fortes tormentas de sarabia en diversos territorios da nosa xeografía que destruíron colleitas e cultivos e produciron, ademais, danos en infraestruturas de titularidade pública e en bens de titularidade privada, vivendas e explotacións agrícolas e gandeiras. Neste sentido tamén se produciron, nos meses de setembro e de outubro, intensas chuvias que provocaron o desbordamento de varios ríos que causaron tamén importantes danos en varias comunidades autónomas.

A xestión destas emerxencias e a minimización dos danos requiriu o esforzo e a colaboración de todas as administracións implicadas mediante a actuación coordinada pola Dirección Xeral de Protección Civil e Emerxencias do Ministerio do Interior, e a participación das forzas e corpos de Seguridade do Estado, os medios aéreos e terrestres do Ministerio de Agricultura, Alimentación e Medio Ambiente e a Unidade Militar de Emerxencias. Todos eles, xunto ás autoridades, bombeiros, policías autonómicas e locais, voluntarios, e cos recursos das administracións autonómicas e locais, contribuíron a que as consecuencias destas catástrofes non fosen maiores.

No marco do principio constitucional de solidariedade e por aplicación dos de equidade e igualdade de trato en relación con situacións precedentes, a magnitude destes feitos e das súas consecuencias obriga os poderes públicos a adoptar medidas extraordinarias consistentes nun réxime de axudas específicas, así como na adopción dun conxunto de medidas paliativas e compensatorias dirixidas á reparación dos danos producidos en persoas e bens e á recuperación das zonas afectadas.

A contía das perdas de produción ocasionadas polos incendios e as tormentas nos cultivos configura unha situación de desastre natural, nos termos establecidos polas directrices comunitarias sobre axudas estatais ao sector agrario.

O obxectivo desta norma é, en consecuencia, aprobar un catálogo de medidas que afectan diversos departamentos ministeriais e abranguen aspectos tales como as axudas por danos persoais ou a diminución das cargas tributarias, para intentar paliar o impacto nos cidadáns e nas empresas afectados.

Sen prexuízo das competencias das comunidades autónomas, a magnitude dos danos ocasionados e a necesidade de asegurar a realización de determinadas actuacións de restauración de carácter prioritario aconsellan a participación da Administración xeral do Estado nas tarefas de restauración forestal e ambiental, en virtude do principio de cooperación interadministrativa.

Por outra parte, o feito de que non se rematase de avaliar o dano producido nalgunhas das catástrofes acaecidas fai necesario que se prevexa a posibilidade de complementar esta norma desde un punto de vista orzamentario, pero non é escusa para demorar a aplicación daquelas medidas máis perentorias que deben contribuír a recuperar, na medida do posible, a normalidade nas zonas afectadas.

#### Artigo 1. *Ámbito de aplicación.*

1. As medidas establecidas nesta lei aplicaranse ás persoas e aos bens afectados polos incendios forestais acaecidos, desde primeiros do mes de xuño ata a súa entrada en vigor, naquelas comunidades autónomas que resultasen afectadas por aqueles.

Igualmente, serán de aplicación as referidas medidas ás consecuencias das fortes tormentas de sarabia que se sucederon en determinadas comunidades autónomas desde o pasado mes de maio.

Estas medidas aplicaranse, así mesmo, ás consecuencias das chuvias torrenciais e das inundacións acaecidas en varias comunidades autónomas, durante os últimos días do mes de setembro e outubro de 2012.

2. Os termos municipais e núcleos de poboación afectados, aos cales concretamente sexan de aplicación as medidas aludidas, determinaranse por orde do ministro do Interior. Para tal efecto, poderanse entender tamén incluídos aqueloutros termos municipais ou núcleos de poboación nos cales, para a correcta execución das obras necesarias, sexan imprescindibles as actuacións dos departamentos ministeriais competentes.

3. O Goberno, mediante real decreto, poderá declarar, con delimitación dos municipios e núcleos de poboación afectados, a aplicación das medidas previstas nesta lei a outros incendios e fenómenos naturais catastróficos que acaecesen ou poidan acaecer en calquera comunidade autónoma e nas cidades de Ceuta e Melilla desde a entrada en vigor do Real decreto lei 25/2012, do 7 de setembro, ata a entrada en vigor desta lei.

#### Artigo 2. *Axudas por danos persoais e por danos materiais en vivendas e enxoval destinadas a establecementos industriais, mercantís, agrarios, turísticos e doutros servizos.*

1. As axudas previstas neste artigo esténdense aos casos de falecemento e aos supostos de incapacidade causados directamente polos sinistros a que se refire esta lei, e réxense polo disposto no Real decreto 307/2005, do 18 de marzo, polo que se determinan as subvencións en atención a determinadas necesidades derivadas de situacións de emerxencia ou de natureza catastrófica, e se establece o procedemento para a súa concesión.

Excepcionalmente, en caso de falecemento de persoas menores de idade, por cada membro da unidade familiar ou de convivencia falecido, os pais percibirán a cantidade de 18.000 euros, sen que sexa de aplicación o requisito da dependencia económica dos beneficiarios previsto no artigo 19 do Real decreto 307/2005, do 18 de marzo.

2. A destrución ou danos en enxoval e os danos en vivenda serán igualmente obxecto de axudas segundo o establecido no Real decreto 307/2005, do 18 de marzo.

3. Sen prexuízo do disposto no número anterior en canto á aplicabilidade do Real decreto 307/2005, do 18 de marzo, co obxecto de acreditar a titularidade sobre os inmobles afectados polos sinistros admitirase como medio de proba calquera documento que demostre tal título, como os recibos de pagamento do imposto sobre bens inmobles ou outros de análoga natureza.

4. As solicitudes para a concesión destas axudas, cuxo prazo de presentación será de dous meses, serán tramitadas polas delegacións do Goberno ou polas subdelegacións do Goberno nas comunidades autónomas afectadas, e serán resoltas polo ministro do Interior no prazo de tres meses, contado desde a presentación da solicitude.

O prazo para a presentación das solicitudes computarase desde a entrada en vigor do Real decreto lei 25/2012, do 7 de setembro, polo que se aproban medidas urxentes para paliar os danos producidos polos incendios forestais e outras catástrofes naturais ocorridos en varias comunidades autónomas, con respecto aos incendios e outras catástrofes naturais incluídos no seu ámbito de aplicación.

Cando se trate de danos producidos polas chuvias torrenciais e outros fenómenos naturais non incluídos no ámbito de aplicación do Real decreto lei 25/2012, do 7 de setembro, pero si no desta lei, o prazo de presentación das solicitudes empezará a contarse desde a súa entrada en vigor.

5. As axudas que se concedan en aplicación do previsto neste artigo financiaranse con cargo aos créditos dos conceptos 472, 482, 771 e 782 da aplicación orzamentaria 16.01.134M «Para atencións de toda orde motivadas por sinistros, catástrofes ou outros de recoñecida urxencia», dotados con carácter de ampliables no vixente orzamento do Ministerio do Interior.

### Artigo 3. *Réxime aplicable ás axudas a persoas físicas ou xurídicas que realizen prestacións persoais e de bens, e réxime de axudas a corporacións locais.*

1. As axudas ás persoas físicas ou xurídicas que realizen prestacións persoais e de bens rexeranse polo disposto no Real decreto 307/2005, do 18 de marzo.

2. As axudas a corporacións locais polos gastos causados para facer fronte a estas situacións de emerxencia rexeranse polo disposto no Real decreto 307/2005, do 18 de marzo, sen que sexa aplicable a contía prevista nos seus artigos 22 e 23.

Estas axudas non terán por obxecto as reparacións ou reposicións de carácter infraestrutural recollidas no artigo 4 desta lei. Non obstante, poderanse subvencionar aquelas actuacións inaprazables que, incidindo no mesmo ámbito de aplicación a que se refire ese artigo, se levasen a cabo co fin de garantir a vida e seguridade das persoas, o funcionamento dos servizos públicos esenciais e a salubridade pública. Entre estas actuacións inclúense a evacuación, o aloxamento e a alimentación de persoas afectadas polas catástrofes, a retirada de lodos e a limpeza de vías e contornos públicos que sexan indispensables para o restablecemento da normalidade, e a retirada de animais mortos.

3. As solicitudes para a concesión das axudas previstas nos dous números anteriores presentaranse no prazo de dous meses, contado a partir da entrada en vigor do Real decreto lei 25/2012, do 7 de setembro, con respecto aos incendios e outras catástrofes naturais incluídos no seu ámbito de aplicación.

Cando se trate de danos producidos polas chuvias torrenciais e outros fenómenos naturais non incluídos no ámbito de aplicación do Real decreto lei 25/2012, do 7 de setembro, pero si no desta lei, o prazo de presentación das solicitudes empezará a contarse desde a súa entrada en vigor.

4. As axudas que se concedan en aplicación do previsto neste artigo financiaranse con cargo aos créditos dos conceptos 461, 471 e 761 da aplicación orzamentaria 16.01.134M «Para atencións de toda orde motivadas por sinistros, catástrofes ou outros de recoñecida urxencia», dotados con carácter de ampliables no vixente orzamento do Ministerio do Interior.

Artigo 4. *Subvencións por danos en infraestruturas municipais e rede viaria das deputacións provinciais e cabidos.*

Aos proxectos que executen as entidades locais nos termos municipais e núcleos de poboación a que se fai referencia no artigo 1, relativos ás obras de reparación ou restitución de infraestruturas, equipamentos e instalacións e servizos de titularidade municipal e das mancomunidades, e á rede viaria das deputacións provinciais e cabidos, aplicaráselles o procedemento de urxencia, e o Estado poderalles conceder unha subvención de ata o 50 % do seu custo.

Artigo 5. *Axudas por danos causados en producións agrícolas e gandeiras.*

1. As axudas previstas neste artigo irán destinadas aos titulares das explotacións agrícolas e gandeiras que, tendo pólizas en vigor amparadas polo Plan de Seguros Agrarios Combinados e estando situadas no ámbito de aplicación sinalado no artigo 1, sufrisen perdas superiores ao 30 % da súa produción, consonte os criterios da Unión Europea a este respecto.

2. Serán obxecto de axuda:

a) As perdas producidas nas explotacións gandeiras como consecuencia dos danos rexistrados sobre as áreas de aproveitamento gandeiro, sempre que os animais de tales explotacións estean asegurados nas liñas de seguros de explotación contidas no plan de seguros.

b) Os danos rexistrados nas explotacións agrícolas e gandeiras para as cales nas datas do sinistro non se iniciase o período de subscripción do correspondente seguro, ou este non finalizase e que non formalizasen aínda a póliza para esta campaña, sempre e cando se contratase o seguro para tal produción e cultivo na campaña anterior.

c) Os danos sobre as producións agrícolas e gandeiras que, tendo póliza en vigor para esas producións amparada polo sistema de seguros agrarios combinados, non estivesen garantidos polo dito sistema.

d) Os danos orixinados nas producións agrícolas e gandeiras non incluídas no vixente Plan de Seguros Agrarios Combinados.

3. As perdas rexistradas nas explotacións gandeiras como consecuencia dos danos sobre as áreas de aproveitamento gandeiro serán obxecto de axudas en concepto de compensación de gastos extraordinarios para a alimentación dos animais.

4. As axudas polos danos causados sobre as producións agrícolas calcularanse tendo en conta as perdas rexistradas sobre a media das producións das tres últimas campañas. No caso de producións leñosas, poderase ter en conta, ademais, unha axuda equivalente ao custo de reposición das plantacións afectadas.

5. Para as restantes producións, a axuda determinarase tendo en conta, na medida en que resulten aplicables, as condicións e os procedementos establecidos no sistema de seguros agrarios.

6. O Ministerio de Agricultura, Alimentación e Medio Ambiente, en coordinación coas comunidades autónomas, establecerá o procedemento para a determinación de todas as axudas previstas neste artigo e a súa contía máxima.

Artigo 6. *Beneficios fiscais.*

1. Concédese a exención das cotas do imposto sobre bens inmobles correspondentes ao exercicio de 2012 que afecten vivendas, establecementos industriais, turísticos e mercantís, explotacións agrarias e forestais, locais de traballo e similares, danados como consecuencia directa dos sinistros, cando se acredite que tanto as persoas como os bens neles localizados tivesen que ser obxecto de realoxamento total ou parcial noutras vivendas ou locais diferentes ata a reparación dos danos sufridos, ou os estragos en colleitas constituían sinistros non cubertos por ningunha fórmula de aseguramento público ou privado.

2. Concédese unha redución no imposto sobre actividades económicas correspondente ao exercicio de 2012 ás industrias de calquera natureza, establecementos mercantís, turísticos e profesionais cuxos locais de negocio ou bens afectos a esa actividade fosen danados como consecuencia directa dos sinistros, sempre que tivesen que ser obxecto de realoxamento ou se producisen danos que obriguen ao peche temporal da actividade. A indicada redución será proporcional ao tempo transcorrido desde o día en que se producise o cesamento da actividade ata o seu reinicio en condicións de normalidade, xa sexa nos mesmos locais, xa sexa noutros habilitados para o efecto, sen prexuízo de considerar, cando a gravidade dos danos producidos dea orixe a iso, o suposto de cesamento no exercicio daquela, que producirá efectos desde o día 31 de decembro de 2011.

3. As exencións e reducións de cotas nos tributos sinalados nos números anteriores comprenderán as das recargas legalmente autorizadas sobre eles.

4. Os contribuíntes que, tendo dereito aos beneficios establecidos nos números anteriores, satisfixesen os recibos correspondentes ao dito exercicio fiscal, poderán pedir a devolución das cantidades ingresadas.

5. Estarán exentas das taxas do organismo autónomo Xefatura Central de Tráfico establecidas pola Lei 16/1979, do 2 de outubro, a tramitación das baixas de vehículos solicitadas como consecuencia dos danos producidos polos sinistros e a expedición de duplicados de permisos de circulación ou de conducción destruídos ou extraviados por estas causas.

6. A diminución de ingresos en tributos locais que os anteriores números deste artigo produzan nos concellos, deputacións provinciais, cabidos insulares e consellos insulares será compensada con cargo aos orzamentos xerais do Estado, de conformidade co establecido no artigo 9 do texto refundido da Lei reguladora de facendas locais, aprobado polo Real decreto lexislativo 2/2004, do 5 de marzo.

7. Estarán exentas do imposto sobre a renda das persoas físicas as axudas excepcionais por danos persoais a que se refire o artigo 2.

Artigo 6 bis (novo). *Exención das exaccións relativas á dispoñibilidade de auga.*

1. Con efecto para o período impositivo de 2012, para os titulares de dereitos ao uso da auga para rega dos municipios de Puerto Lumbreras, Lorca, Totana, Alhama e Mazarrón da provincia de Murcia, e Pulpí, Cuevas del Almanzora, Huércal-Overa, Vera, Zurgena e Antas, da provincia de Almería, concédense as seguintes exencións:

A cota da tarifa de utilización da auga e do canon de regulación establecidos no artigo 114 do texto refundido da Lei de augas.

As achegas correspondentes aos gastos fixos e variables de funcionamento da tarifa de condución das augas incluídos nas letras b) e c) do artigo 7.1 da Lei 52/1980, do 16 de outubro, de regulación do réxime económico da explotación do acueduto Texo-Segura.

A cota da tarifa de condución das augas pola infraestrutura do postransvasamento (bacía do Segura), prevista no artigo 10 da Lei 52/1980, do 16 de outubro, que fose aplicable ás augas propias da bacía.

Así mesmo, determinaranse exencións no canon de regulación do transvasamento de auga do Negratín ao Almanzora, ás comunidades de regantes afectadas pola catástrofe.

2. Os suxeitos pasivos das exaccións sinaladas no número anterior que satisfixesen total ou parcialmente as cotas correspondentes ao período impositivo a que alcanzan as exencións terán dereito á devolución das cantidades ingresadas.

Artigo 7. *Reducións fiscais especiais para as actividades agrarias.*

Para as explotacións e actividades agrarias, realizadas nas zonas que determine a orde que se dite en desenvolvemento do artigo 1 desta lei, e conforme as previsións contidas no punto 4.1.º do artigo 37 do Regulamento do imposto sobre a renda das persoas físicas, aprobado polo Real decreto 439/2007, do 30 de marzo, e o número 3 do



artigo 38 do Regulamento do imposto sobre o valor engadido, aprobado polo Real decreto 1624/1992, do 29 de decembro, o Ministerio de Facenda e Administracións Públicas, á vista dos informes do Ministerio de Agricultura, Alimentación e Medio Ambiente, poderá autorizar, con carácter excepcional, a redución dos índices de rendimento neto a que se refire a Orde EHA/3257/2011, do 21 de novembro, pola que se desenvolven para o ano 2012 o método de estimación obxectiva do imposto sobre a renda das persoas físicas e o réxime especial simplificado do imposto sobre o valor engadido.

#### Artigo 8. *Medidas laborais e de Seguridade Social.*

1. Os expedientes de regulación de emprego que teñan a súa causa directa nos danos producidos polos acontecementos catastróficos sinalados nos puntos primeiro e segundo do artigo 1 desta lei, así como nas perdas de actividade directamente derivadas deles no sector da hostalaría e hospedaxe que queden debidamente acreditados, terán a consideración de provenientes dunha situación de forza maior, coas consecuencias que derivan dos artigos 47 e 51 do texto refundido da Lei do Estatuto dos traballadores, aprobado polo Real decreto legislativo 1/1995, do 24 de marzo. No primeiro suposto, a Tesouraría Xeral da Seguridade Social poderá exonerar o empresario do aboamento das cotas da Seguridade Social e por conceptos de recadación conxunta mentres dure o período de suspensión, manténdose a condición dese período como efectivamente cotizado polo traballador. Nos casos en que se produza extinción do contrato, as indemnizacións dos traballadores serán por conta do Fondo de Garantía Salarial, cos límites legalmente establecidos.

Nos expedientes en que a empresa decida a suspensión de contratos ou a redución temporal da xornada de traballo con base en circunstancias excepcionais, o Servizo Público de Emprego Estatal poderá autorizar que o tempo en que se perciban as prestacións por desemprego, reguladas no título III do texto refundido da Lei xeral da Seguridade Social, aprobado polo Real decreto legislativo 1/1994, do 20 de xuño, que teñan a súa causa inmediata nas catástrofes, non se compute para os efectos de consumir os períodos máximos de percepción establecidos. Igualmente, poderá autorizar que reciban prestacións por desemprego aqueles traballadores incluídos en tales expedientes que carezan dos períodos de cotización necesarios para ter dereito a elas.

2. As empresas e os traballadores por conta propia, incluídos en calquera réxime da Seguridade Social, poderán solicitar e obter, logo de xustificación dos danos sufridos, unha moratoria de ata un ano sen xuro no pagamento das cotizacións á Seguridade Social e por conceptos de recadación conxunta correspondentes a tres meses naturais consecutivos, contado desde o anterior á produción do sinistro ou, no caso de traballadores incluídos no réxime especial dos traballadores por conta propia ou autónomos, desde o mes en que aquel se produciu.

3. Os cotizantes á Seguridade Social que teñan dereito aos beneficios establecidos nos números anteriores e satisfixesen as cotas correspondentes ás exencións ou á moratoria de que se trate poderán pedir a devolución das cantidades ingresadas, incluídos, de ser o caso, os xuros de demora, as recargas e custas correspondentes. Se o que ten dereito á devolución é debedor á Seguridade Social por cotas correspondentes a outros períodos, o crédito pola devolución será aplicado ao pagamento de débedas pendentes con aquela na forma que legalmente proceda.

4. Para levar a cabo as obras de reparación dos danos causados, as administracións públicas e as entidades sen ánimo de lucro poderán solicitar do Servizo Público de Emprego competente a adscrición de traballadores perceptores das prestacións por desemprego para traballos de colaboración social, de acordo co disposto no artigo 213.3 do texto refundido da Lei xeral da Seguridade Social.

#### Artigo 9. *Réxime de contratación.*

1. Para os efectos previstos no artigo 113 do texto refundido da Lei de contratos do sector público, aprobado polo Real decreto legislativo 3/2011, do 14 de novembro,

poderán ter a consideración de obras, servizos ou subministracións de emerxencia, logo do correspondente acordo do órgano de contratación previsto na letra a) do punto primeiro do citado artigo, os contratos de reparación ou mantemento de infraestruturas, equipamentos ou servizos, así como as obras de reposición de bens prexudicados pola catástrofe, calquera que sexa a súa contía.

2. Declárase urxente a ocupación dos bens afectados polas expropiacións derivadas da realización das obras a que se refire este artigo, para os efectos establecidos no artigo 52 da Lei de expropiación forzosa, do 16 de decembro de 1954.

3. Para a tramitación de expedientes de contratación de obras non incluídas no artigo 126.2 do texto refundido da Lei de contratos do sector público, dispensarase do requisito previo de dispoñibilidade dos terreos, sen prexuízo de que a súa ocupación efectiva deberá ir precedida da formalización da acta de ocupación.

Artigo 9 bis (novo). *Liñas preferenciais de crédito.*

1. Instrúese o Instituto de Crédito Oficial (ICO), na súa condición de axencia financeira do Estado, para instrumentar unha liña de préstamos en función da avaliación dos danos e da demanda conseguinte, utilizando a mediación das entidades financeiras con implantación nas comunidades autónomas afectadas, coas cales se subscribirán os oportunos convenios de colaboración.

2. Esta liña de préstamo terá como finalidade financiar a reparación ou reposición de instalacións e equipamentos industriais, turísticos e mercantís, agrícolas, forestais, gandeiros e de regadío, automóbiles, motocicletas e ciclomotores de uso particular, vehículos comerciais, maquinaria agrícola e locais de traballo de profesionais que se visen danados como consecuencia dos sinistros, e materializaranse en operacións de préstamo concedidas polas ditas entidades financeiras.

3. Mediante acordo da Comisión Delegada de Goberno para Asuntos Económicos concretaranse as características técnicas da liña de préstamo e as partidas orzamentarias que queden vinculadas á súa instrumentación. As operacións de préstamo contarán cunha bonificación de xuros que se atenderá desde o crédito que se habilite no orzamento do Ministerio de Economía e Competitividade con cargo ao Fondo de Continxencia de execución orzamentaria. A contía deste crédito determinarase de conformidade co que estableza o citado acordo da Comisión Delegada de Goberno para Asuntos Económicos.

Artigo 10. *Cooperación coas administracións locais.*

1. Facúltase o ministro de Facenda e Administracións Públicas para propor o pagamento das subvencións derivadas de danos en infraestruturas, equipamentos e instalacións e servizos de titularidade municipal e das mancomunidades, a que se refire o artigo 4, na parte que financie a Administración xeral do Estado, unha vez efectuadas as valoracións de danos, ata o importe máximo que se determine nos reais decretos de desenvolvemento.

2. Tales subvencións atenderanse con cargo ao crédito que para estes efectos se habilite, co carácter de incorporable, nos orzamentos dese departamento. De conformidade co establecido no artigo 50.1.b) da Lei 47/2003, do 26 de novembro, xeral orzamentaria, o crédito que se habilite financiarase con cargo ao Fondo de Continxencia de execución orzamentaria, cuxa autorización corresponderá ao Consello de Ministros.

3. De igual modo, facúltase o titular do Ministerio de Facenda e Administracións Públicas para establecer o procedemento para a concesión das mencionadas subvencións, así como o seu seguimento e control, no marco da cooperación económica do Estado aos investimentos das entidades locais.

Artigo 11. *Actuacións de restauración forestal e ambiental nas comunidades autónomas afectadas.*

1. Facúltase o ministro de Agricultura, Alimentación e Medio Ambiente para declarar zona de actuación especial para a restauración forestal e ambiental das zonas afectadas e para declarar a emerxencia das obras que deba executar o dito departamento, nas seguintes materias:

a) Restauración hidrolóxico-forestal, control da erosión e desertificación, así como traballos complementarios, nos espazos forestais incendiados para mitigar os posibles efectos de posteriores chuvias.

b) Colaboración para a recuperación e rexeneración ambiental dos efectos producidos polos incendios forestais nos espazos da Rede Natura 2000, en particular nos tipos de hábitats de interese comunitario e nos hábitats onde existan especies de interese comunitario, endemismos ou especies incluídas na Lista de Especies Silvestres en Réxime de Protección Especial.

c) Apoio directo á retirada e tratamento da biomasa forestal queimada, de ser o caso.

d) Colaboración no tratamento para control de pragas nas masas forestais.

e) Restauración de infraestruturas rurais de uso xeral, así como de camiños naturais e vías verdes.

2. Para os efectos das declaracións citadas no número anterior, será necesario que a superficie forestal afectada polo sinistro reúna algunha das seguintes características:

a) Que sexa superior a 5.000 hectáreas.

b) Que sexa superior a 1.000 hectáreas, das cales máis do 70 % sexa de superficie forestal arborizada.

c) Que sexa superior a 500 hectáreas que estean incluídas en lugares da Rede Natura 2000 e que afecten municipios que acheguen polo menos o 50 % do seu termo municipal a esa Rede.

d) No territorio insular, as superficies exixidas anteriormente serán as seguintes: no suposto da letra a), 2.500 hectáreas; no suposto da letra b), 500 hectáreas, e no suposto da letra c), 250 hectáreas.

3. A execución de tales actuacións estará condicionada ao financiamento do 50 % do seu custo pola comunidade autónoma correspondente.

Artigo 12. *Consortio de Compensación de Seguros.*

1. O delegado do Goberno na comunidade autónoma afectada poderá solicitar do Consorcio de Compensación de Seguros, para unha máis correcta avaliación dos danos non persoais, as correspondentes valoracións necesarias conforme os artigos 2 e 3 desta lei, sempre que non afecten bens de titularidade pública.

2. O Consorcio de Compensación de Seguros terá dereito ao aboamento por parte da Administración xeral do Estado dos traballos de peritación conforme o baremo de honorarios profesionais que o consorcio tivese aprobado para os seus peritos taxadores de seguros.

3. Para facilitar a tramitación das axudas e a valoración dos danos, a Administración competente e o Consorcio de Compensación de Seguros poderanse transmitir os datos sobre beneficiarios das axudas e indemnizacións que concedan, as súas contías respectivas e os bens afectados. As entidades aseguradoras que operen no territorio español estarán obrigadas a subministrar ao Consorcio de Compensación de Seguros a información que este lles solicite para dar cumprimento ao disposto anteriormente.



Disposición adicional primeira. *Límites das axudas.*

O valor das axudas concedidas en aplicación desta lei, no que a danos materiais se refire, non poderá superar en ningún caso a diferenza entre o valor do dano producido e o importe doutras axudas ou indemnizacións declaradas compatibles ou complementarias que, polos mesmos conceptos, poidan conceder outras administracións públicas, ou correspondan en virtude da existencia de pólizas de aseguramento.

Disposición adicional segunda. *Créditos orzamentarios.*

A reparación dos danos nos bens de titularidade estatal, así como as indemnizacións que se concedan por danos en producións agrícolas e gandeiras, financiaranse con cargo aos orzamentos dos respectivos departamentos ministeriais; para estes efectos, realizaranse as transferencias de crédito que sexan necesarias, sen que resulten de aplicación as limitacións contidas no artigo 52.1.a) da Lei 47/2003, do 26 de novembro, respecto da realización de transferencias de crédito desde operacións de capital a operacións correntes.

Disposición adicional terceira. *Financiamento das axudas por danos en producións agrícolas e gandeiras e das actuacións de restauración forestal e ambiental nas comunidades autónomas afectadas.*

As axudas por danos causados en producións agrícolas e gandeiras e as actuacións de restauración forestal e ambiental a que se refiren, respectivamente, os artigos 5 e 11 financiaranse con cargo ao Fondo de Continxencia de execución orzamentaria, aos créditos que habilite o Ministerio de Facenda e Administracións Públicas ou mediante consignación nos orzamentos xerais do Estado, segundo se dispoña no real decreto que o desenvolva e complemente.

Disposición adicional cuarta. *Actuacións do Ministerio de Defensa e do Ministerio do Interior.*

Para atender os gastos ocasionados ao Ministerio de Defensa e aqueles en que incorrese o Ministerio do Interior pola extinción dos incendios acaecidos nas comunidades autónomas a que se refire o artigo 1 desta lei, o Goberno, por proposta do ministro de Facenda e Administracións Públicas, habilitará os correspondentes créditos nos orzamentos deses departamentos ministeriais, de conformidade co previsto nos artigos 50 e 55 da Lei 47/2003, do 26 de novembro, ata o importe máximo que se determine nos reais decretos de desenvolvemento.

Disposición adicional quinta. *Anticipos de axudas vinculadas a determinados préstamos para a mellora e modernización de estruturas agrarias.*

Nos termos municipais afectados de acordo co artigo 1, con carácter preferente, poderase efectuar o pagamento anticipado do importe total das axudas de minoración de anualidades de amortización do principal dos préstamos acollidos ao Real decreto 613/2001, do 8 de xuño, para a mellora e modernización das estruturas de produción das explotacións agrarias, daqueles expedientes dos cales se dispoña da correspondente certificación final de cumprimento de compromisos e realización de investimentos.

Disposición adicional sexta. *Convenios con outras administracións públicas.*

A Administración xeral do Estado poderá subscribir os convenios de colaboración que requira a aplicación desta lei cos órganos competentes das comunidades autónomas e das corporacións locais afectadas.

Para os efectos da emisión do informe preceptivo e vinculante a que se refire a disposición adicional trixésima da Lei 2/2012, do 29 de xuño, de orzamentos xerais do Estado para o ano 2012, teranse especialmente en conta as circunstancias que xustifican a adopción das medidas reguladas nesta lei.

Disposición adicional sétima. *Réxime das cooperativas agrarias situadas nas zonas afectadas.*

As cooperativas agrarias que teñan o seu domicilio fiscal nos ámbitos territoriais a que sexa de aplicación esta lei, e cuxa actividade resultase directamente afectada polos danos producidos polas catástrofes, poderán superar os límites establecidos no punto cuarto do artigo 93 da Lei 27/1999, do 16 de xullo, de cooperativas, e no número 10 do artigo 13 da Lei 20/1990, do 19 de decembro, sobre réxime fiscal das cooperativas, respecto das operacións realizadas por terceiros non socios. Para iso, deberán solicitar as autorizacións establecidas, respectivamente, no número 2 do artigo 4 da Lei 27/1999, do 16 de xullo, e no artigo 14 da Lei 20/1990, do 19 de decembro.

Disposición adicional oitava. *Comisión interministerial de seguimento das medidas de apoio a damnificados.*

1. Créase unha comisión interministerial para a aplicación das medidas de apoio previstas nesta lei coordinada pola Dirección Xeral de Protección Civil e Emerxencias, e integrada polos representantes dos ministerios de Defensa, de Facenda e Administracións Públicas, do Interior, de Emprego e Seguridade Social, de Industria, Enerxía e Turismo, de Agricultura, Alimentación e Medio Ambiente e da Presidencia, así como polos delegados do Goberno nas comunidades autónomas afectadas e por un representante do Consorcio de Compensación de Seguros.

2. O seguimento das medidas de apoio previstas nesta lei levarao a cabo a comisión a que se refire o número anterior, en coordinación coas autoridades das comunidades autónomas, a través das respectivas delegacións do Goberno.

3. Antes do 31 de xullo do ano 2013, a comisión interministerial elaborará un informe sobre as actuacións levadas a cabo en execución desta lei.

Disposición derradeira primeira. *Título competencial.*

Esta lei dítase ao abeiro do disposto nas regras 7.<sup>a</sup>, 13.<sup>a</sup>, 14.<sup>a</sup>, 17.<sup>a</sup>, 23.<sup>a</sup> e 29.<sup>a</sup> do punto primeiro do artigo 149 da Constitución, sen prexuízo das medidas adicionais de protección que adoptasen ou poidan adoptar as comunidades autónomas afectadas.

Disposición derradeira segunda. *Facultades de desenvolvemento.*

O Goberno e os distintos titulares dos departamentos ministeriais, no ámbito das súas competencias, ditarán as disposicións necesarias e establecerán os prazos para a execución do previsto nesta lei.

Disposición derradeira terceira. *Entrada en vigor.*

Esta lei entrará en vigor o mesmo día da súa publicación no «Boletín Oficial del Estado».

Por tanto,  
Mando a todos os españois, particulares e autoridades, que cumbran e fagan cumprir esta lei.

Madrid, 26 de decembro de 2012.

JUAN CARLOS R.

O presidente do Goberno,  
MARIANO RAJOY BREY